

NAQQIUT

Taarsissavaa siunnersuut ullulerneqartoq 10. august 2018

Tunngavilersuut

UKA 2018/195 amma 196-imi siunnersuutip kalaallisuunngortinnerani § 4 kukkunersuiinikkut allannguuteqartinneqarpoq.

UKA 2018/196-imi siunnersuutip kalaallisuunngortinneqarnerani § 1, imm. 1, amma § 2 a, imm. 4-mi iluarsisooqarpoq, soorluttaaq siunnersuutip misissorneqarnerani kukkunersuisooqartoq.

Uunga siunnersuut: Pigisanit pissarsiat ilaasa akileraarusersorneqartarnerat pillugu Inatsisartut inatsisaata allanngortinneqarneranik Inatsisartut inatsisaat nr. xx, xx. xxx 2018-imeersoq amma Soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaata allanngortinneqarneranik Inatsisartut inatsisaat nr. xx, xx. xxx 2018-imeersoq

(Aningaasaqarnermut Naalakkersuisooq)

Saqqummiussissut

Siullermeerneqarnera

Matumuuna pigisanit pissarsiat ilaasa akileraarusersorneqartarnerat pillugu Inatsisartut inatsisaata allanngortinneqarneranik Inatsisartut inatsisissaattut siunnersuut kiisalu Soraarnerussutisiaqalernissamut aningaasaatit ilaannit pissarsiat akileraarusersorneqartarnerat pillugu Inatsisartut inatsisaata allanngortinneqarneranik Inatsisartut inatsisissaattut siunnersuut Naalakkersuisut sinnerlugit saqqummiutissavakka.

Inatsisissatut siunnersuutit taakku aningaaserivinni soraarnerussutisiaqalernissamut ingerlaavartumik ileqqaakkanit pissarsiat akileraarusersorneqarnerinut tunngapput imminnullu atassuteqarlutik. Taamaattumik Naalakkersuisut qinnutigaat, inatsisissatut siunnersuutit ataatsikkut Inatsisartunut saqqummiunneqassat.

Aningaaseriviit taakku marluk kissaateqarnerisigut siunnersuutigineqarpoq, soraarnerussutisiaqarnissaq siunertaralugu ileqqaakkanit pissarsiat akileraaruserneqartarnerat, Pigisanit pissarsiat ilaasa akileraarusersorneqartarneranik Inatsisartut inatsisaat malikkunnaarlugu, Soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaat malissagaa.

Aningaaseriviit naapertorlugit allannguut annertuumik sipaaruteqartitsissaaq. Sipaarutissat millioninit amerlanerussasut missingerneqarpoq. Peqatigitillugu Akileraartarnermut Aqutsisoqarfimmut innuttaasunullu allaffissornikkut suliaasat annikillissapput, soorlu allannguutit innuttaasunut aningaasartuutaassanngitsut.

Tamatuma saniatigut soraarnerussutisiaqarsinnaatitaasut aamma soraarnerussutisiaqartitsisartut pigisanit pissarsiat ilaasa akileraaruserneqartarnerat pillugu Inatsisartut Inatsisaanni pineqartunut ilaasut, pissarsianik naatsorsuinnermut periaatsinik assigiinngitsunik atuinissamik toqqaasinnaassasut, PFA Pension-imit kissaatigineqartoq ilaannakortumik akueriniarlugu Naalackersuisut aalajangerput. Taamaalilluni siunnersuutigineqarpoq tamatumunnga taarsiullugu soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaanni § 3-imi allassimasup toqarneqarnissaanik periarfissaqarnissaq ammaanqassasoq. Maannakkut periaaserineqartoq malillugu, ukiup ingerlanerani tunniunneqartut ilassutigalugit, pissarsiat illuatungaani ukiup isertitaqarfiusup naanerani sillimmasiissummi aningaasaatit nalingisa, illuatungaani ukiup ingerlanerani akiliutigineqartut ilassutigalugit, ukiup isertitaqarfiusup aallartinnerani aningaasaatit nalingisa, assigiinngissutaattut, pissarsiat naatsorsorneqartarput. Periaatsimi nutaami naatsumik oqaatigalugu pissarsiat naatsorsorneqarsinnaalissapput, taamaalilluni erniat aamma ernianit pissarsiat soraarnerussutisiaqarsinnaatitaasup ileqqaagaannut ilanngunneqartut isumaqatigiissutigineqareersut kisimik akileraaruserneqartalissallutik. Periaaseq toqarneqareerpat, taanna ukiumi isertitaqarfiusumi kingusinnerusumiittumi allanngortinneqarsinnaanani pisussaaffiliissaaq. Piffissap ingerlanerani periaatsit marluk taakkua akuusunut tamaginnut aningaasaqarnikkut assigiimmik inerneqartitsilissasut naatsorsuutigineqarpoq.

Siunnersuutigineqarpoq, siunnersuutit taakku marluk ukioq isertitaqarfik 2018 aallarnerfigalugu atuutissasut. Taamaasilluni qulakkeerneqassaaq, siunnersuutip annertuumik iluaqutissartai 2018-imi atuutileriissasut. Matumani erseqqissassallugu pingaaruteqarpoq, siunnersuutit innuttaasut allaffissornikkut nammatassaannut annikillisaassammata kiisalu allannguutit taakkununnga aningaasartuutaassanatik.

Naggasiullugu inatsisissatut siunnersuutitut kiisalu taakkununnga nassuiaatinut innersuussissaanga.

Taama oqaaseqarlunga Naalackersuisut sinnerlugit inatsisissatut siunnersuutit taakku marluk Inatsisartunut suliaanngorlugit tunniuppakka.